



**Nunani Avannarlerni Killerni "Immamik Minguitsuutitsinermut Nersornaammik" pilersitsinissamik aningaasaliinissamillu taperseeqqullugit Savalimmiuni, Kalaallit Nunaanni aamma Islandimi Naalakkersuisut Nunat Avannarliit Killiit Siunnersuisoqatigiiffianit kaammattorneqarput, taanna piujuaannartitsinermik tunngaveqarluni immamit pisuussutinik aqutsinissamik atuinissamillu kiisalu immami avatangiisit peqqissuunissaasa pisuussuteqarluarnissaasalu nukittorsarneqarnissaanik immikkut suliniuteqartunut iliuseqartunullu tunniunneqartassaaq.**

(Aallartitat siulittaasuat Vivian Motzfeldt)

(Siullermeerneqarnera)

Tamaat isigalugu ataatsimut Nunani Avannarlerni Killerni "Immamik Minguitsuutitsinermut Nersornaammik" pilersitsinissaq isumassarsiaq ajungikkaluarpoq. Siunnersuulli suliarilluagaanngitsutut isikkoqarpoq.

Kikkut nersornaaserneqassaneranut erseqqarissumik paasinarluartumillu ersarinngilaq kina/kikkut aalajangiisartussanersut? Suliniutit imaluunniit inuit innersuunneqartassappaat, taamaattoqassappallu kikkut innersuussisassappat? Nersornaatip aningaasartai qanoq annertutigissappat aammalu kiap aningaasalersussavaa?

Nunat Avannarliit Killiit Siunnersuisoqatigiiffiata meeqqanut inuusuttunullu atuakkianut nersornaasiisarnerani tunngaviusut assinginik tunngaveqartinniarneqarpoq. Taakkunani nunani pingasusuniit allaaserisaq ataaseq innersuunneqartarpoq, taakkualu oqaannaraanni nersornaaserneqarnissamut unammisarput. Periusarli taanna maanna pineqanngilaq, taamaammallu assersuutigineqartoq eqqumiigaarput.

Allatut oqaatigalugu Demokraatit isumaqarput aalajangiinissamut tunngaviusut naammangitsut. Demokraatit siunnersuummut tapersersuissappata aappassaaniinnginnerani tamanna aaqqiivigineqartariaqassaaq.

Taamaammallu siunnersuutip aappassaaneerneqarnissaa UPA2021-mut kinguartinneqartariaqartoq isumaqarpugut, Nunat Avannarliit Killiit Siunnersuisoqatigiiffianilu siunnersuut aaqqissuunneqartariaqassaaq. Siunnersuut massakkutut isikkoqarluni aappassaaneerneqarnissamut innersuunneqassappat Demokraatit itigartinneqarnissaanut innersuutissavaat.

Taamatut tunngaveqarluta siunnersuut Nunat Avannarliit Killiit Siunnersuisoqatigiiffianni sammineqarnissaanut innersuupparput.